

# **PENTECOST MESSAGE**

\_Pastor Satminlen Khongsai\_

## **Youth Secretary, KBC (I)**

\*Pentecost\* kiti hi kimkhat in thupi tah in alan kimkhat in geldoh in jong aneipon, ahin hiche nikho hi athupina dang dang umjeng jongleh Christian te dia \_Houbung Pen-nikho\_ ahijeh in athupin, geldoh jingdia kultah khat chu ahi. Hiche nikho hi Christmas, Good Friday le Easter Sunday nikho ho sanga thupi sahlouvin umjeng jongleh hiche nikho a hi Houbung kitihi Jesu Christa'n ana phudoh nikho ahi ti ana geldoh jing ut.

## **\*Pentecost hi ipi ham?\***

Christian ho din Pentecost hi Jesu Christa'n ana tep dungjuiya tahsancha/houbung chung a-itih a chongden dinga Lhagao Theng abuh lhahna nikho ahunghin ahi. Solchah lekhabu a kimu Pentecost nikho lhun masang jep, Jesu Christa thijou le thodoh jou chun, Jesu nungjui ana umjeng jongleu Houbung kiti chun chalohna ana neiloudan kicheh tah a mudoh ahi. Hito lhon'a tahsan masaho chung hihen thilsoh ho hijongleh ivetleh Pentecost kiti hi Houbung hungkipatna nikho ahilou jongleh Houbung Pen-nikho ahung hidan kichehtah a muchet ahi.

## **\*Pentecost thucheng hin ipi akoudoh em?\***

English thucheng \_"Pentecost"\_ hi Greek thucheng \*Pentekostos,\* kiti a kon a kiladoh son a hichun "somnga" atina ahi. Hichu masang lai Christian hon ana seidoh jing u thulhon \_"pentecoste hemera"\_ kiti a kon'a hung kilason a hichun "ni-somnga ni" atina ahi.

Ahin hiche thucheng hi Christian hon ahin semdoh u ahipon, hichu Greek pao tho Juda mite hon amaho Kut nikho khat seina a ana manchah uva kon'a hung kilason ahi. Hichu Juda hon \_Hapta Kut\_ ahilou leh Hebrew paova \_Shavuot\_ tia ana koujiu chu ahi. Hichu Thempudan 23:16 na'a Israel miten hapta sagi ahiloule ni-somnga, Kalchuh Kut kichai nikhoa pat ana simdoh diuva thupeh ana um a kon'a hung kiladoh son ahi.

\_Shavuot\_ kiti hi Israel mite dia Kut aneihou lah'a Kut thupi anina anahi. Atil chun hiche Kut hi Lholhon Kut (harvest festival, Exodus 23:16) tin ana kihen, ahin phat ahung chedung juiyin Israel miten Sinai moul a Pathen in Dan apeh u geldoh jingnan ahin mangpan tauvin ahi. Hito lhon a Christian te dia hiche nikho thupi dan hi ahileh Jesu Christa thodoh (Easter Sunday) a patna nikho hapta sagi nisomnga lhin nikho chu Juda ten Shavuot atiu Pentecost nikho chu ahin, hiche nikho tah a chu Lhagao Theng, Jesu nungjuiho chung a ana kibung lha a, mission natohna a hatna hungchang uva, hiche akiloikhomnau chu Houbung tia hungkihepan ahitai.

## **\*Pentecost nikhoa chu ipi ana soh mong mong em?\***

Hiche nikho hi Thulhun Thah a Solchahte kiti lekhabu bung 2 sunga akimun hitin akipan in ahi. \_"Chuin Pentecost ni \*(greek: ten hemeran tes pentekostes)\* ahung lhung tan ahile, abonchauva munkhat a umkhom ahiuvin"\_ (Solchahte 2:1), phulou helouvin, hui hattah nung gin bang agingin aumnau in chu adimsoh jengin, meikong bangin lei ahung kilah in aluchung cheh uva achongin "amaho Lhagao Theng adimset tauvin, Lhagaovin aseidohsah bangun paochom paochom in thu aseipan tauvin ahi" (Solchahte 2:4).

Hiche nikhoa paochom kitho hi vannoiya kitho pao ho ahin, hetlou pao anahipoi. Ajeh chu gamtin a kon'a Juda mite hiche Shavuot kiman nadinga hunggho chun apao cheh in akijah un, hichu ahileh paochom, akithopao ahin hetloupao anahipoi. Hiche Pathen thilbol loupitah chu mihon amu uvin kidang asalheh jengun ahi, ajeh chu mi tampin Jesu seijui hon paochom atho u ajah uva Lhagao Theng ahung chan u amu uva chu jukham dan a ana ngaitou ahi (Sochahte 2:13).

Hiche thilsoh toh kilhon in Solchah Peter chun Pentecost nikhoa mipi maiya chun thupi aseipan tan ahi. Hiche thilsoh umchan chu Themgao Joel seidoh (Joel 2:16-21) mangchan Ninunung a thilsoh ding ahinseidoh in ahi. Pentecost nikhoa Lhagao Theng miho chung a achuh banga Ninunung nileh Themgao Joel thusei doh banga mijouse chung a Pathen Lhagao kibunglha ding ahidan chu ana seidoh ahi. Hichea hetding khat chu Peter in Joel thusei doh chu Pentecost nikhoa guilhung ahitai tia aseidoh ahipoi, Pentecost nikhoa hi Joel thuseidoh aguilhung naipon ahi.

Hiche to lhon chun Peter in jong Nazareth Jesu thodoh thu aseiya Lhagao Theng ahinsol ding atepdungjuiya aguilhun dan aseidoh jon ahi. Hiche a chun mipi hon ipi aboldiu hitam tia thudoh anei utoh lhon in, Peter in jong alung ahei uva Jesu min'a baptize achandiudan aseipeh in ahi. Hiche chu abol uleh achonset u kingaidam'a Lhagao Theng thilpeh changdiu ahidan jong aseidoh in ahi (Solchahte 2:37-39). Hiche nikhoa Peter thusei ngaiya tahsan a mi 3000 chun Houbung chu ahin be tan ahi (Solchahte 2:41).

**\*Pentecost nikho le Pentecostal Houbung akimat na um em?\***

Pentecost hi Houbung Pen-nikho ahi akiti toh lhon in hiche nikhoa thilsoh hohi Pentecostal Houbung hon tunigeiya sohjing ding a tahsan jing jeng u khat ahi. Amaho tahsan dan in \_“mikhat chu lhagaova penthahna aneileh Pentecost nikhoa banga Lhagao Theng change paochom a thu aseidoh ding”\_ ti ahi. Chuban ah Pentecostal Houbung ho tahsan kit khat chu ahileh Pentecost nikhoa paochom kitho hi vanpao/hetloupao ahi ti ahi. Ahin adihlouna chu gamchom chom a kon'a hunghon ama ama gam paochom a ajah u chun aphondoh e. Hetding khat chu Pentecost hi Houbung Pen-nikho ahijeh in thil kidang tampi anasoh doh e, ahin hiche nikhoa thil soh jouse sohjing ding ahi tina ahipoi. Paochom kitho jong vannoiyin atho pao ahi dan akicheh in, chule lhagaova pengthah jousen apenthah nikho leh paochom thotheina aneidinga Pentecostal ho tahsan jong dihthei ahipoi. Paul jeng jong Damascus lampi a Jesun amat chun paochom athopoi. Tahsan masa tamtah Jesu atahsan nikhouva paochom tho jong akitam mudoh poi.

**\*Pentecost a kon'a kihilna:\***

**\*1. Tahsan chakhat lhagaova adim angaiye:\*** Lhagaova dim akiti teng leh Lhagao Theng chu tamtah hija hichu i-chung a hung dim ding tina ahipon, Lhagao Theng puihoina noiya hin ding tina joh ahi (Eph. 5:18). Hito lhon chun Pentecost nikhoa Jesu nungjuiho jeng jong Lhagao ana dim un hijeh chun tijat kichatna ana neitapouvin, hakat tah in Kipana Thupha ana samphong un, mihem 3000 jen in houbung ahinbe tauvin ahi. Tahsan cha khat chu Lhagaova dimjing, Lhagao puihoina noiya hingjing angaichat dan mudoh ahi. Lhagao puihoina neilou chun lhagao matna neithe i pontin, lhagao manlou chu Lhagaova dim hiponte, ajeh chu Lhagaova dim khat chu anatoh in apodoh teiye. Lhagaova dimlou chun hangsan tah in Pathen thu seiphong jou ponte. Tukhanga hin Tahsan cha chung a Lhagao Theng natoh alhasam tan, Pentecost ngaichat ahikittai.

**\*2. Tahsan chate kipumkhoma natohkhom angaiye:\***

Pentecost nikhoa Jesu tahsanna hin neiho tahsan twilut ahung chan jouvun “solchah thuhila jong, kitho khom in jong, chanlhah semkeh in jong, taovin jong apangdet jing tauve” (Solchahte 2:42). Hichun tahsan chate kipum katna le panlah khomna ahung um pat dan kichehtah a mudoh ahi. Pentecost nikho chun hitobang chu analhut theileh tunia Pentecost ga, houbung in jong lhagao lam to kisai, kihilna, kitho khomna, taokhomna a pan thah lah kitding akultai. Hiche hi tukhanga houbung sunga kiha mu talou ahin hichun lhagaova dailhahna eimudoh sah tauve. Lhagao Theng chu Jesu seijouho kipum khom lou petna jong kibung lha thei ahinai, ahin Pakai lenggam a pan alahkhomdiu deisahna jeh a Jerusalem a kipumkhom'a aum laitah uva Lhagao Theng hung kibung lha ahi.

### **\*3. Tahsan chate jouse hettosah hi-ding angaiye:\***

Pentecost nikhoa Lhagao Theng ahung kibuhlha Jesu seijui ho chungahung chuh jouchun koima atouthim a aumtapouvin ahi. Kipana Thupha chu hangsan tah le hakat ah in ahettohsah tauvin ahi. Paochom paochom atho theinao chu moh thu mot mot seinan amang pouvin, hiche paochom athou chun Jesu Christa thupha get-together nan ana mangun ahi. Hichun Lhagao Theng achung uva achon mudohna jong ahung hin ahi.

Pentecost chun Jesu seijui jouse hettosah ahisah thei leh tunia tahsan cha jouse jong hiche hettosah a panla dinga ong lou akihitai ti mudoh ahi. Christa Lhagao inei u hettosah a pang ihiunam? Lhagao Theng chang ihiuva ahileh Jesu dia ichan a hettosah a pang ihi tah uvem? Na Christian hina imm-jing, Lhagao Theng chang nahi seidoh lou, Jesu nungjui nahi podoh ngamlou nahileh lhagaova elbaina khat umhinte tih hetsa ahi.

Muntin'a Houbung mithengte, tukum Pentecost hi itobanga mangdinga kigotna nanei em? Anopna theitah a manding chu ahinai, ahin Lhagao Theng jaona lou Pentecost jong hithei ahi. Lhagao kibuhlha nikho hikit henlang, Lhagaova halthah nikho hikit hen lang, Lhagaova ga-sohdohna nikho hikit henlang, Lhagao Theng thahatna thah inei kit nikhoh hikit hen lang, Lhagaova kipumkhomna nikho hikit henlang, Hettosah ihiu geldoh thah nikho hikit leh Pentecost tahbeh ihoubung uva mudoh hikit tante. Kakipha-e

\*\*\*\*\*